

民國二十一年重修

開平縣志

高要余榮謀書端

香港荷李活道  
民聲印書局印

序

方志史體也無古今重之凡所爲圖表畧錄者識疆域詳建置溯沿革而官師之蹟賦役之式民風之淳漓人才之豐嗇以至治亂災祥物產名勝莫不釐然可指數守土者一展卷而古鑑在焉此政教之輔也辛未夏五榮謀奉命承乏斯邑斯邑清初自新會新興恩平析置通爲里五十幅員雖狹而川原綺錯物阜而民秀頗有聲於嶺海間其文獻必有足徵者迨治事數月遍訪志乘於薦紳之家始悉前令之志開平者爲薛爲陳爲王薛陳二志久佚王志亦不得一完本計自道光以降闕劓者逾百年中更劉令盛堂李令介丞先後開館議修而竟無所就竊以爲懼焉蓋斯土自建邑以迄乾嘉當時官紳草創經營又撫綏而教養之寢成樂土其謀猷必有可法者及紅變客難迭爲蹂躪益以鼎革十餘年城池至於七八陷其將何以爲

開平縣志

卷首

邑乎荆榛何以芟夷流亡何以安集法令日新又何以應上而不病吾民雖欲借鑑於既往而典籍蕩然亘百年無所考徵至是而益懼迺與邑中薦紳倡議重修壬申之春開局長沙聘張孝廉筱峯總其成周明經毓初爲之副並賴諸耆宿分類纂輯矢心共事以底於成今冬卒功因而有感自維奉職無狀治行誠不能與賢宰比然講求民生利病與政教所宜徵文考獻網羅而整齊之此固藐躬之責也抑亦所以竟前令未竟之志也夫

中華民國二十二年十二月高要余榮謀序於長沙行署

二十四史名史者十名書者十有三獨三國以志爲名志誌也凡以誌事也周官外史掌四方之志小史則掌邦國之志今之縣邑古之邦國今之縣邑志古之邦國志開平以順治六年歲次己丑立縣縣之有志薛志最先陳志繼之薛志成於康熙癸丑然未付印付印自陳志始時康熙乙未也道光癸未則有王志於今百有十年矣歷年既久益以喪亂志之尤其亟郤尤其難攷光緒乙未劉令以志事聘陽湖吳翊寅主藁藁成未及梓久乃失去宣統己酉馮令奉檄輯鄉土史聘予啟琛弟主之予時聽鼓山右以書勗曰鄉土史吾弟之碎金云爾出此碎金勉成完璧修志不難耶旋啟琛赴京應舉以舉首籤縣江西而斯事又不果自辛亥之變越九年庚申李令設志局長沙仍推啟琛爲總纂啟琛豪於文其文中之史尤吾子京也宋子京能成新唐書宋公序可以無事矣竟多年不成功因亂告罷而其藁

開平縣志

卷首

二

亦遭毀無僅存者見秦煙而不豫爲魯壁賡續之難何如哉今縣長高要余公以辛未蒞政明年春踵庚申故事復設長沙之局局中自采訪編修以至校讐謄錄皆效其職而殷殷以啟琛所未竟者屬之於予予辛亥去官歸來伏處海濱自分謝絕人事久矣獨於修志之事欲謝而不能絕者律以浮海之議父母之邦縱可去揆之維桑之敬父母之邦之事不可忘也賴余公始終其事無少懈向所爲三舉三輟乃幸觀成於今日天時人事良非偶然蓋事之相左者易而難時之已至則難而易也然則辭總纂不居而與同居分修之職何也歐陽公與宋子京之於新唐書總則俱總分則俱分無階級之異也成書期以半年又何也明人以一年成元史爲史家最劣然邑志與國史不同且爲經費所限不得不策馬遲以追枚速聖人云速則不達亦云敏則有功矣是志分十有八門圖居首易以圖成卦書以

圖獻卜蕭何收秦圖書藏之沛公具知天下阨塞戶口多少疆弱處圖之足尙久矣圖是圖其地應次以輿地而必先列沿革者沿革爲未定之輿地輿地爲已定之沿革也有輿地而後建置輿禹貢爲地理最古之書言厥土亦言既宅故次建置周禮言建國者曰體國經野建置次以經政宜也又曰設官分職經政應次以職官今介前事於經政職官之閒者由今日職官所施之經政溯及以往之經政前事蓋徹上而徹下也職官由選舉而來當其爲職官亦非選舉人才不可孔子所以告仲弓之爲宰者可思矣故次選舉選舉行則職官有善政武城弦歌滅明有力焉故次宦績閒有宦績於彼而流寓於此者凡名人蹤蹟皆足爲山川生色不必其施政也故次寓賢宦績寓賢雖外人而觀感所及則本境之人物應之故次人物列女亦人物而禮云男女異長易亦男女分索示有別也故人物專屬男子而

開平縣志

卷首

三

以列女次焉列女匪盡屬節孝有長皆錄再標節孝爲表變風柏舟之義也依旌例節孝建坊耆壽百歲亦建坊五福之首人瑞宜彰故次耆壽孔子言禮重文獻耆壽獻也藝文文也故次藝文漢藝文志不收金石然金石亦藝文之一端宋儒已有專輯故次金石古蹟多有碑石爲標識故從阮通志次金石後其有屬於此不稱屬於彼而亦不得者且或事涉細碎捐棄足惜又當如昌黎所謂兼收並蓄細大不捐故以雜錄終焉張啓煌謹撰

自古史才難而作志尤難誠以志者文獻之所繫非諳於故實者未易能貫澈始末鑑別去取釐然有當也而况睽隔缺殘已久纂輯於鼎革亂離之際乎邑中舊志竣修於清道光三年迄今已歷百有餘歲時遷事貿紀載缺如前光緒二十二年間知縣劉盛堂聘陽湖吳翊寅重修尙未脫稿而去嗣後雖復屢有議修者卒無成於是邑人欲尋一殘缺之邑志而不可得惟聞城西謝蘭亭君家藏一帙亦非完本則吉光片羽誠危乎其絕續之交也民國二十年五月高要余侯蒞縮邑篆觀風問俗舉廢起墜悵然於文獻之無徵乃與邑人士謀續修之而商於鼎新暨黃君漢光勉予以協修之責先向各地方商市分區墊款萬圓爲修費聘張君啓煌爲總纂并委周君鍾嶽籌辦局務旋即延致分纂及各區採訪人員剋期六閱月而稿成越年二月開局至七月間歲事彙次編錄沿革分併大略椎輪具有其開平縣志

卷首

序

又三

質隨復由總纂約同分纂周君鍾嶽吳君樹華各任門類斧藻條貫旁參博稽發微闡幽以舊志簡畧多所增補分訂比附期於盡善庶幾周慎詳核罔有譌舛越遺遂決發梓於二十二年之十月先是墊款之萬圓竣局時已開銷七千餘祇尙存款二千餘圓不敷刊費尙鉅乃以香港開平商會名義招工開鑄余侯則力任籌措補足鼎新自維羈於冗務徒厠虛名於志事固無能爲役然獨有感於余侯之敷政宣猷知所先務章志貞教其有裨於一邑之文化風俗當非淺渺此則揆於區區愛鄉土之心固不無稍慰焉耳吳鼎新謹序

縣長高要余公續修志今冬鉸板上距脫藁之月十有六距開局加六月焉前之六月草創討論之事也數十人共之費絀不得不急就後之十有六月修飾潤色之事也二三人負之費絀仍不敢急就今且就矣而當局一泝洄焉猶惕惕於茲役之匪易繼絕舉廢誠不能不有賴於久任敬持之賢有司也公之始下車也求志乘於縉紳之家累月不得一完本於是有續修之倡維時公私告竭費無所出乃進其耆老約貸萬金而酬以志不足則公自任之公恭己而信政治民心故命下而衆皆奮赴去歲二月設局長沙凡編纂參閱來訪諸執事皆禮聘以至又徵及菲材俾佐吾師張筱峯先生總厥成先生講學自晦志事自香港遙領弟子服勞義無所辭而鍾嶽所負荷者乃愈重而愈弗勝矣局中多前輩容我就正惜舊志王本最晚出去今已逾百年更亂數四官中圖籍蕩然故家所有亦多散佚存者惟

開平縣志

卷首

四

張葩初鄉土史藁展轉蒐討遲遲借材於邑外尙幸莫予之拒也及藁成移港先生即謝遣生徒婢力以將鍾嶽積千慮之一得間月輒渡海走報同事吳堅魯文學亦多所獻替蓋前此所成草卒不能爲諱文獻絕續一髮是系稍假時日庶幾萬一之補拾每侍先生校訂三四易猶未卽安雪夜不恤數起而客館所藉於公帑者特筆札之給而已方經始時先生懇懇期我爲宋子京子京佐歐陽修成新唐書誠相得益彰鍾嶽則何敢擬此惟茲鄉邑聞見述遲信來後學誠不能無責既辱知於公重以師命其敢不驅沒抑舊令會澤劉公豐順李公亦嘗從事於是矣未及告終旋遷秩以去獨公久任而持之以敬用底於成斯亦天時人事之相值耶恩平聶君子才篤學士也於吾邑掌故所系後先箚示執柯慙矣而忽增邪許之應聲又不可以不識太歲在昭陽作詒涂月之吉邑人周鍾嶽謹譔

舊序

薛志邑令池陽薛璧序邑之有志紀實也古輶軒氏采錄方物及所歷風壤上之秘府以備參讎蓋以萃羣邑之名勝集天下之大成從來尙矣開邑新闢縣治草昧未寧凡建置之侈陋山川之險易人物之淑慝版籍之興替生植之豐瘠風俗之淳澆載籍闕焉是考之文獻而無徵也後此安所取鏡乎余承乏茲土退食之餘搜集舊章漫無稽考修輯之志實厪余懷際今上纘承祖宗功德允武允文大輯天下罷邑志翩翩皇猷不越深禁而周知萬里猗歟懋哉此正博採鐘箎鼓吹休明之會也爰偕學博朱公鳴珂敦請孝廉甄君芑明經張君國祚開局修造分疏條貫明經勞士禎岸衿張光岳黎光奎周夢雷梁上標勞愛之等旁求參訂矢心共事以補職方山海之或遺至於綜核去取余直任之夫今之志即古之史也史以有徵爲信志

開平縣志

卷首

五

以不濫爲實茲幸有成使山川邱賦朗若列眉人物風俗煥如指掌以至顯而政治隱而昭格營建築作之鉅草木鱗虫之微靡不臚列備晰詮次詳明則此一志也雖闔邑文獻攸關而世道人心之感維風植教之權誠嘉賴之矣後之君子蒞斯土者知治化之是資宜民易俗用宏教養之型生斯土者知樹人之有本養正慎修永賴載贊之誼品行旣淑文教孔彰凜王章而茂嘉猷新矩矱而綿舊德開平不大有造歟余雖不敏敢不濡毫珥管以爲他日券康熙十二年癸丑

薛志邑孝廉甄芑序上古之史出自王朝如三墳五典八索九邱由來尙矣孔子刪書斷自唐虞禹謨湯誓殷盤周誥莫非史氏之所傳然皆行之爲一王之法垂之爲治世之書而未及列國之史也至周命輶軒氏博採風謠獻之太史以觀民之貞淫好僻而十五國之風

教殊焉是十五國之風孰非十五國之史之所寄哉嗣是列國各置史官以掌時事孔子於是因魯史而作春秋春秋者固以一王之法正人心而維世教原其初亦不過一國之史耳其後漢司馬遷採上古方書以作史記有列傳志表以成一家言其叙山川險易俗尚淳漓犖然臚列今之邑志亦史氏之流亞歟茲者聖天子治定鼙極鼓吹休明乃命儒臣纂修一統志使各省郡邑皆得修志以上達天朝亦古者輶軒采風意也開平縣治新建方二十餘年前未作志事多簡畧凡所稽考皆得之郡邑遺獻遺文之間且開平於天下特管中一豹耳恐其所采不足以贊勳盛治然昔子游宰武城而有絃歌之聲子賤宰留父而有鳴琴之治豈可以小邑而靳治化耶吾邑侯薛公來蒞茲土兩載而政通人和四民獲息教化漸興茲奉文修志之會上承天子德意不敢漫易置之屬其事於芑與明經文學諸君惟

開平縣志

卷首

六

思芑少無名山之遊長乏龍門之筆辭謝不敏至再至三不獲已而勉承公命緣考邑事之舊載在各縣志內者輒用採摭更益以新所見聞爲之分立類例詳編綱目首輿圖正封域也次紀事備時事也封域正則風氣隨之故次之以風俗風俗之善惡必須官以董正之故次之以秩官有官府然後有創建故次之以沿革建置創造既定必須食以守之故次之以食貨然猶恐早濼之不常築隄之不備故水利次之食貨足然後禮樂可興故典禮學校次之學校既設人材乃成故選舉次之有文事必有武備故兵防次之善人國之紀邑之典型攸繫不可遺也故繼之以人物焉詞賦道德之徵文材所關其可忽諸故終以藝文焉各次其序畧示論斷間有出之已意必先參以衆見取其苟可以裨益世道而存乎勸戒或有當於聖朝之博采者凡三閱月而書成若曰紹聖世繼春秋本詩書禮樂之際芑則何

敢焉康熙癸丑

薛志邑拔貢張國祚序郡邑有志猶古有史也古者列國之史史官掌之今郡邑志則賢守令董修之凡郡邑其來已遠歷代相沿有志則繼起而爲之者易若郡邑新建網羅搜集則創始而作之者難吾邑介新會新寧新興恩平四邑之間勢據上游道扼衝要明嘉靖間因古塘宅堡議移參戎府以謹守禦萬歷間併堡爲屯崇禎十七年盜發太守張公看踏其地以爲宜建縣治會燕都告變未及舉行本朝順治六年家孝廉蒙自尹張鉅璘偕諸文學陳請用成其事遂割三邑之土田封域通爲里五十而設縣於屯即古所稱倉步村也建邑伊始文廟城隍廟城郭衙宇百務草創欲修邑志未遑也適今聖天子登寶位之十一年命修方輿考畧而邑侯關中薛公來宰吾邑政簡刑清四民樂業正邑志可修之時又部文方到之日於是侯請

開平縣志

卷首

七

孝廉甄君芑并屬書於予俾襄厥業顧祚才識不逮何足副侯委任之意力辭不獲乃取三縣舊志凡前三縣而今割屬一邑者其地理人物事宜一一收歸志內本之舊所記載益以新所見聞共成志若干卷一披閱而輿圖山川風俗物產可覽而見也戶口賦役學校典禮兵防水利沿革建置可考而得也名宦人物秩官選舉仙釋流寓事紀藝文可觀而知也志成予於是竊有感矣凡言貴取信於將來史足以取信於將來是曰良史志足以取信於將來是曰實志豈不存乎修之之人哉班馬而下史不一家京邑而外志實孔繁其得曰修者之得焉耳其失曰修者之失焉耳人心攸關世教咸賴故昔人於此矢公矢慎惴惴焉不敢孟浪一字予懼記載之失實見聞之不足不足以信今而傳後也雖然有賢明府以鑒載之有同事諸君以研訂之總其宏綱詳其節目於志事亦大畧備矣異日者有樹勳庸

於廊廟而爲國家一代柱石名臣者焉有鳴道學於海內而爲吾儒大德碩望者焉有擅文章於嶺表而爲文壇宗工哲匠者焉志曰某也某地人也某代人也其足以光斯乘也是在乎後起者焉予濡毫竢之矣康熙癸丑

陳志邑令濫陵陳還序粵稽虞書命官分宅四隩各敘其風土教化陰陽寒煖氣候物類之宜禹奠九州而鑄九鼎以象方物成周職方氏掌邦國之圖小史掌邦國之志陳詩納賈以觀民風迨及春秋列國有史秦有圖書漢郡國皆有圖志則志之所由來遠矣我國家定鼎統一宇內車書萬國今上聰明天縱文武聖神殲三逆藩而誅噶爾旦南極臺灣北抵朔漢皆入版圖幅幘之廣聲教之訖前古所未有也然猶勤求民瘼鑒觀四方慮海甸遐荒耳目有所未逮歲戊辰特詔儒臣修一統志己丑復命修方輿考畧蓋欲周知土俗險易遠

開平縣志

卷首

八

近豐歉增減毋致一夫失所德至渥也開平居萬山中外連巨海憑踞險阻民易作奸明萬歷崇禎間盜賊蜂起鞭長不及控馭爲難本朝順治六年割三縣之地而立邑治弭盜安民誠爲長策夫有邑必有志康熙十二年春前官池陽薛君璧屬邑人甄君芑等始修邑乘草創未備未及成書還承乏茲土無徵是懼甲午秋詔遣輿圖使者繪南方九省之圖星輅至粵還聞而悚惕曰聖天子省方觀民於方域事克殫睿衷守土之臣受一方之寄志乘有闕無所取裁是還之罪也夫於是廣集父老博採舊聞諮諏逸事參以前志訛者待正闕者待補文獻既有可徵乃開局聘東莞陳生阿平以董其事退食之餘相與齎訂而武林曹子克明共爲參校近考遠稽殆無掛漏刪繁舉要務必精詳凡五閱月而書成爰登梨棗俾後之蒞斯土者觀輿圖封域之有考而知疆理規畫之宜殷也觀則壤賦役之有考而知

勸勞撫字之宜周也觀兵防戎政之有考而知綱繆有備之宜預也觀災祥豐嗇之有考而知修省弭禦之宜先也而邑之士大夫觀鄉賢之流芳史冊崇祀春秋有不思齊振勵樹功名于竹帛垂德業于天壤者乎而高人節婦亦不致湮沒弗傳矣則此一志維持風化扶植綱常豈淺鮮哉唐虞三代之所以久安長治者用是物也輜軒採十五國之風可以藉手而獻矣康熙五十四年乙未

陳志東莞陳阿平序朱子守南康下車首問郡志君子謂其知所務夫志以記方域分野山川地形戶口風俗人文物產爲政所必資也太公封於齊五月而報政周公曰何速曰吾因其俗簡其禮通商賈之業便漁鹽之利蕭何入關先取秦丞相府圖書會計關中踵兵給糧轉運無闕由其知秦版籍按圖而具故得不匱高帝封功臣以何第一然則志之所係大矣哉吾師溫陵陳公以名進士出宰開平新

開平縣志

卷首

九

建之邑先是康熙癸丑邑侯薛公璧屬邑人甄君芑始修邑志草創未備未刻成書自癸丑至今又四十三年矣歲久因循一邑事實未有以識之者公召平而命之曰邑之星野封域不可不紀也妖祥豐歉不可不書也沿革建置不可不晰也風俗物產無容或忽也子盍爲我成之納幣致餼平以不敏辭而不獲復思志猶史也自十志撰於班固而史因之省郡州縣例皆有志彷彿古者列國之史書夫所記山川道里非以示廣遠欲其識險易知戒懼也記戶口田畝非以誇富庶欲其察息耗毋徵奪也記五土宜產非以給嗜慾欲其因物致用周民利也至於吏治得失風俗美惡人才衆寡書之皆有微旨存焉鏡於水者知於人鏡於古者知於今蓋取以爲鏡也是知鏡躔度則知所調變鏡山川則知所經理鏡兵賦則知所節縮鏡習俗則知所變化鏡方物則知所封植鏡徵應則知所修弭夫孰非人之所

幹旋而政之攸賴哉此朱子所爲知所務而吾師惓惓也遂承公命而公簿書之暇共載簡焉總六十餘年之事凡二十四卷自建邑始康熙乙未

按陳阿平字獻孟一號鉢山居士東莞廩生文名藉甚復工八法與陳恭尹屈大均梁佩蘭輩往來唱和嶺以南自督撫將軍以至典試大員莫不折節下交所著鉢山堂詩文集爲四庫所收詳東莞志

王志邑令諸城王文驥序邑居之聚散與世運之盛衰恒相倚伏方其聚也無以保之則聚者散矣及其散也有以聯之則散者復聚矣故即一邑而盛衰之全象見焉開邑當山海之交北扼新興西控恩平襟高明而帶新會明季蜺岡梁金諸險爲羣盜往來之衝於是分割三邑立縣以鎮之而後民得蘇息百餘年來漸成樂土長沙烏石

開平縣志

卷首

十

之間桑麻被野舳舻連空穰穰然一都會也邑之有志始於康熙癸丑創之者池陽薛君其後溫陵陳君踵而爲之規模具矣迄於今紀載畧焉聖天子厚澤深仁治於海表二三賢守令相繼撫綏其民計荒蕪之墾闢生物之繁滋以及賢俊英喆之秀發當什倍於曩時不有以哀輯之奚以備其盛衰究其聚散爲將來考證乎歲辛巳予以簡命來官茲土始索觀邑乘則薛志已不可得陳志亦蠹蝕不全每以爲憾三年癸未有奉行纂輯之令乃與邑之士大夫倡謀重修延學博李君科孝廉張君綬琮等共勦厥事公退之暇親加釐定書成竊有感焉夫開邑之始固合衆以成聚者也建縣以來局凡三變其始豐城李公因地設屯據險而守之一變也旣而改屯爲縣握四邑樞紐以重馭輕再變也至雍正間又分建鶴山縣然後犄角相倚無復滲漏三變也故同一山川砦壘化而夷塗矣同一阡陌荆榛化而

禾黍矣同一人民戟爰化而耨鋤矣昔何以由盛入於衰今何以從衰復於盛得無撫此編而滋懼乎是用不揣固陋爲之參互考訂博采旁搜察得失之機驗豐耗之變始於星野終於外紀宏綱細目罔敢或缺事迹未詳者取之三縣義例未協者參之通志務期簡核明備繼薛陳二君之後而補其所不逮庶覽斯志者得以因端竟委原始要終思夫版籍何以日廣生齒何以日富風俗人才何以日茂而後處其盛不忘其衰當其聚常憂其散持盈保泰先事預防而開平之勢固於苞桑矣若云矜博洽寓褒貶以附史氏之後豈予所能哉道光三年癸未

王志訓導新會李科序自古政教之設必因其土俗之宜而利導之循吏下車伊始有以知其利病所由爲之酌古審今移易風俗不於志乘取之於何取之故文獻之傳政教之本也開邑舊志事多草創

開平縣志

卷首

十一

又未分置鶴山迄今百有餘年宜修久矣邑侯諸城王公以詞苑來蒞茲邑嘗欲與士紳共訂之適大憲檄修郡縣志遂慨然以爲已任政平多暇益取鄰近郡邑志遍觀之曰吾得其要矣茲志之修豈獨增載後事已乎朝廷之區畫諸君子之用心盡在於是竭公餘之力補其缺畧正其異同綱舉目張因舊志加以詳核而於山川夷險土風醇漓三致意焉夫開平之地環帶恩新高鶴及會寧諸邑率皆日夕可達當有明之季土賊蠡起遷延竄伏幾不可窮詰豈民性之異哉勢使然也嘗稽其四域倚山面海下者皆可墾而植高者亦可險而踞作梗之輩非盡開民也內訌者倚爲負隅外來者資爲塗徑耳其屬隸諸邑非不可以兼治而建議者汲汲有鞭長不及之慮始則因兵立屯繼則因屯設縣故豐城李君開之於前寧高諸君子平之於後至復析爲鶴山縣而縱橫數百里皆衽席矣國家承平旣久礪

确皆成沃壤惟魯悉化文明生其間習爲固然不復知有往日良甚幸矣抑思服先疇食舊德果何道致此乎此一志也予於舊事間有商確新採者一惟王公去取願獨不能已於言者亦欲深明賢侯之意俾邑人士安享大平益以光美前修并冀後之蒞斯土者思縣所由建而圖匱防逸政教因之庶文獻之傳非具文云爾道光癸未

按李科字魁文新會河塘人乾隆甲寅恩科舉人來任訓導著有悔遲詩集詳新會志

王志邑孝廉張綬序考古列國各有史官採方言以記時事由來舊矣自易封建而郡縣邑宰爲百里侯邑之有志猶古列國之有史也開平自皇朝順治六年置縣及雍正十年又割建鶴山雖地屬彈丸然有人民有社稷是烏可以不志康熙十二年癸丑薛侯璧及邑人甄芑始倡修志未及成書五十四年乙未陳侯還聘東莞陳生阿

開平縣志

卷首

十一

平重加輯訂乃登梨棗自乙未迄今又歷百有餘歲矣世遠年湮蒞斯土者欲考其事蹟書缺有間前嘉慶十四年琮承乏義學講席署令陳侯聞炳倡續修會洋匪入寇地方蹂躪經費維艱吏亦遷除靡定遂以不果而邑人所望於命世賢宰稽文諏獻嚴筆削以昭法戒者固甚殷也道光元年辛巳諸城王侯以太史之才屈百里之寄下車後政簡刑清暇取舊志披閱之見其簡編殘缺門類不清煩者宜刪缺者宜補久塵侯慮三年癸未大府令郡縣志同時輯纂此正網羅搜集鼓吹休明之會也邑遂開局屬琮暨各紳協修琮等自顧謏劣詎敢當鉛槧之役賴侯仕優之下筆削一稟春秋相與勉從校閱三閱月而告成由是大綱小目展卷瞭如事增於前文省於舊曾南豐所謂良史者明足以周萬事之理道足以適天下之用智足以知難知之意義足以發難顯之情然後能勝其任今侯非誠勝任而愉

快者乎鳴單父之琴握董狐之筆其所以備文獻之徵而昭聖世邅隆之治者非淺鮮也抑琮更有念焉往者邑中蛋戶捕魚間有乘夜出海私約奸民肆掠者雖有東西巡船上下邏緝而奉行故事鞭長不及至上馬石冷水逕大羅村闊洞等處深山邃谷尤寇宄出沒之藪侯悉心區畫於蛋戶則編保甲以稽其出入往來於巡船則捐俸修其器械簡其壯勇令與新寧巡船互相救援諸險隘亦分兵防守有備無患自是人皆畏法水無萑苻之警陸無禦人之盜非侯之保民若赤何能思慮周詳如是山寧海謐本德政發爲文章宜茲志之燦然朗然也因泚筆而並識諸簡道光三年癸未

凡例

一涑水通鑑截自前代龍門紀史兼錄當時惟於當時亦有斷限自叙云至於麟止以示獲白麟後不錄如春秋然也春秋感麟而作經止獲麟爲止於其所起今本此例邑志以民國二十一年開修而起議則在二十年故紀至二十年而止

一志以圖爲重故古稱志曰圖經又夏官治兵以職方掌天下之圖明示以圖之尤關軍用也邑舊志圖開方測算未詳其法且於軍用無關今所繪圖總與分爲若干幅經緯釐然尤注意軍事測量方之舊志粲然可觀矣

一沿革本諸史志及前代疆域圖記然必兼載鄰縣分合始明開平分縣之始分自新會者十之六七分自新興恩平十之三四本其已分追其始合非敢越界聊以遡源

開平縣志

卷首

凡例

一通志謂史記一書功在十表列行縈紆徑寸之內千年萬里舉目可詳舊志於沿革及職官選舉節孝耆壽俱不列表但以年代先後分行書之而已今依阮通志改列爲表補所未備庶幾詳而能簡各志多同此例

一周禮鄉大夫三年大比興賢者能者書以登於天府因此有鄉貢之名明代始稱鄉貢爲舉人故選舉表內隨朝代而異其名稱

一三國志人物不標門類阮通志用其例人物傳祇以年代相次列女傳亦然邑舊志人物分風節勳勞德望文學四門列女又專取節烈其他種之賢明及文藝可觀者概不錄今略事變通以阮通志爲式其不曰列傳而曰略者不敢儼史家體也

一列女略雖非專登烈女而仍以烈女爲尤重則列女可該節孝今於列女略外又立節孝表不嫌駢枝者表以表其事實之不甚詳

應立傳而又無從立傳者也

一顧亭林謂古人不輕爲人立傳明知多所割愛然於行誼上一善足錄非關特色者又或專以文字見長者可留以登之家乘無須立傳於邑志家乘宜詳邑志宜簡也亦以見家乘與國史相維之意

一藝文去取體例非一致德施文選不錄生存孝穆玉臺兼登見在今依文選所登皆前人之作也論人既以蓋棺而允故譚藝亦以沒世而公唯略中祇登書目如漢志例其詩文散附各略中以類相從若無類可附始摘其尤者與序文及評隲語夾注書目之下

一書目或目存而文不存亦仿隋書經籍及唐書藝文存佚胥列於

開平縣志

卷首

凡例

二

一舊志無金石凡碑記列之藝文然必金石自爲一略則其實存古

物適以爲藝文之印徵况金石之文與藝文之文異體讀韓文公

碑序可見 茅雁甫譏文公碑序異史公豈碑序必效史體爲工耶 姚姬傳不然順甫之說其意亦主金石應自爲一略也

一乾嘉以前攻僞尙書如閻惠諸家未出凡著述引書而用僞古文者未容追改若乾嘉以後仍然眞僞不分恐授人口實用敢不避過求酌改一二唯仍以不傷本來面目爲宗旨

一春秋紀異不紀祥紀祥唯桓三年書有年宣十六年書大有年凡以重民食也今志內譜之災異備書祥瑞則祇書其關於年穀者一闕文分二例有本無而闕其事以待攷者有原有而闕文代以方空者方空例見逸周書

一虞仲翔謂世上無神僊

昌黎誰氏子詩亦云神僊雖然有傳說知名盡知其妄矣

史記黃帝升

僊事不見之五帝本紀而見之封禪書以志武帝之惑耳漢志神僊入方伎亦是養生之僊術而非飛昇之僊術故志內於神僊之